

КАЗКИ




ДЛЯ МАЛЫХ ДЕТЕЙ.

Заяц и жабы та иншѣ казки.

EX
LIB
RIS




PAUL R. MAGOCSI



КАЗКИ ДЛЯ МАЛЫХ ДѢТЕЙ.

ЗАЯЦЬ И ЖАБЫ ТА ИНШѢ КАЗКИ.



ВЫДАВНИЦТВО ТОВ. „ПРОСВѢТА“ В УЖГОРОДѢ.

УЖГОРОД 1923.

СОДЕРЖАНИЕ :

Заяць и жабы	стор. 3
Лисиця та качка	" 4
Зозуля	" 5
Лисиця и Тетервак	" 5
Медвѣдь и пчѣлы	" 7
Лисичка и журавель	" 8
Воробчик	" 10
Лебедь, щука и рак	" 11
Пан Коцькій	" 13


* * *

Заяць и жабы.

Одного разу прийшло зайцеві на думку, що нікто его не боїться, нікто перед ним не утїкає, но противно, он сам од всїх утїкає: и од медведя и од вовка и од лисицї и од чоловіка — словом од всїх.

Зажурился тяжело тай каже:

„От поїду тай утоплюся“!



Тай побїг. Бїжить, бїжить не озираючися. Прибїгає над воду и хотїв вже скочити, абы утопитися. На березї сидїли жабы. Почувши кроки зайця — хлоп у рїчку тай поховалися...

Урадовався заяць тай прийшла ему нова думка:

„Нї, не буду топиться! Суть еще и такї на свїтї, котрї мене бояться.

Лисиця та качка.

Плаває собі качка по воді, аж тут прибігає лисиця.

„Добрий день“ — каже лисиця.

„Доброго здоровля!“ — оповідає качка. „А що доброго скажете?“

„Розказав би багато доброго, та нема часу, бо біжу з двору. А чи не ви отота качка, про котру люди кажуть, що нема красшої на цїлє село?“ — звідуює лисиця.

Качка не знала де дітися з радости.

„Та може и я!“ — говорить.

„Та ходіть скорше зо мною до двора, бо пані хоче вас видіти!... Вы не знаете, які вы всюды славні, навіть и на дворі вас знають!“

Дурна качка не багато думала, вискочила на берег, а хитра лисиця тогды ю за шию хап!

„О так“ — каже, — пыха вже не одному шию скрутила.“

Зозуля.

Послухайте мене, я оповѣм вам одну правдиву исторію — говорила зозуля птицям, чижам, щиглам и синицям. Была я далеко, в глубокѣм и густѣм лѣсѣ. Там чула я, чого до теперь не чувала, як соловѣй спѣває. Зовѣм не по нашому.

И я красно спѣвала але все таки не так. А сердце онъ завмирае од радости, коли онъ весь голос розпустить, а потѣм затягне або тихенько пустить трелѣ — забудешся зовѣм и лиш голову склониш. Що проти него свирѣль! Слухала я, слухала тай подивляла.

Однак, нѣгде правды дѣти, и я научилася по соловѣеному спѣвати. От почекайте, так заспѣваю вам точнѣсенько як онъ. Хотите?

Заспѣвай, почувеме!

Тихо будьте, анѣ слова! Теперь сяду еще выше на голузь. Но слушайте теперь:

„Ку-ку, ку-ку, ку-ку!“

* * *

Лисиця и Тетервак.

Голодна лисиця цѣлый день никала по хащи и глядала собѣ ѣды. Вынюхала всѣ корчѣ — нѣчого не найшла. Бѣгла она пиля високого дерева, почула, що межи густыми голузями щось зашелестѣло.

Она задерла голову до горы и увидѣла на деревѣ Тетервака.

Довго лисиця на него поглядала, все хвостом выкручовала и раз пораз облизовалася. Та тѣлько бѣда, що высоко онъ сидѣв, не мож було до него добратися.

Пустилася лисиця на хитрощѣ. Задерла в гору голову и каже:

„Терешку! Я в столицѣ была, у вашего царя наказ достала!“

„А щож там в нѣм написано?“ зазвѣдав тетервак.

„Там написано, що вам тетервакам не скакати по деревам, а гуляти по зеленым лугам“.

Только она того вимовила, чуе недалеко од хашѣ гавкає собака. Она зазвѣдала Тетервака:

„А що тобѣ, Терешку, видно з дерева? Кто до нас иде?“

„Та то мужик“.

„А еще кто за ним бѣжить?“


„Лоша“.

„А як оно хвѣст держить?“

„Гаком“.

„Ага! Ну прощай, бо не маю часу. Треба до вечера всѣм птицам прочитати наказ“.

И побѣгла лисиця дальше.



Медвѣдь и пчолы.

„Стук! стук!“

„А кто там?“

„Я, медвѣдь.“

„За чим?“

За медом.“

„Мы пчолы меду не продаем нѣколи.“

„Як нѣт, то возьму так! Дивѣться, якій у мене кулак.“

Не чекаючи поки попросять, гость всунув до улия язык и ѣсть.

Та ще не розсмаковав горазд, як его пчолы обсядуть! Ся тне з переду, друга з заду, а та у нѣс жалить, еще инша в уха. — Утѣкае медвѣдь що духу.

А пчолы за ним женуть:

„Медведю, стої! Правда, що добрый мед?“

„Та що з того, коли не мѣй.“

Лисичка и журавель.

Народня казка.

Лисичка жила у велико́й приязни з журавлем, а наві́тъ были собѣ кумами. Кличе раз лисичка журавля до себе в гостину.

„Приходь, кумцю! Приходь любцю! Чим хата богата, тым при́йму“.


Иде журавель на проше́ный обѣд, а лисичка наварила кашки з молочком, розмазала тоненько на тарѣльцѣ и поставила перед кумом.

„Живися кумочку, не погордуй! Сама я варила!“

Журавель стук — стук дзюбом — нѣ́чого не возьме. А лисичка тым часом лиже тай лиже кашку, аж поки сама всеѣ не зѣла. А коли вже кашки не стало, каже она:

„Выбачай, кумочку, бо́льше не маю чим тебе гостити. „Спасибѣ и за тое“ — по́сным голосом промовив журавель. „Аты-бы кумонько, до мене завтра в гостѣ прийшла“.

Добре, кумочку прийду. Чому — бы и не прийшла — одповѣла лисичка.



На другій день, приходить лисичка, а журавель наварив мяса, фасолѣ, рѣпы, покраяв усе те на дробни кусочки, зложив у високе горняток з узкою шийкою (довжанку) та поставив на столѣ перед лисичкою.



„Живися, кумонько! Непогордуй любамоя!“ понуковав журавель.

Нюхає лисичка — добра страва! Хоче встромити голову в довжанку, не влѣзе. Пробує лапкою, годѣ

вытягнути. Крутиться лисичка, бѣгає коло горнятка — не порадить. А журавель не дармує.

Дзьоб, дзьоб у горнятко, тай выѣдає поволи смачну страву, доки всѣго не выѣв.

„Перебачте, кумонько,—мовить, коли вже випорожнив горнятко. — Чим хата богата, тым и рада. А бѣльше на той раз я не постарався“.

Розсердилася лисичка, навѣть не подякувала за гостину. Она думала, що на цѣлый тыждень наѣстѣся, а тут прийшлося голоднѣй ити до дому.

Од тогды лисичка зрѣклася водити приязнь из журавлем.

Воробчик.

Жив собѣ один воробчик. Та бѣда была, что быв дурненькій. Нѣчого он не умѣв, анѣ гнѣзда звити, анѣ доброго зеренця найти. Де сяде там и засне. Что прииде ему на очи то и зѣсть. Но при томъ быв дуже упертый и скорый до битки.

Одного разу лѣтав он из своим товаришем по дворѣ. Лѣтали, бавилися, порпали по смѣтю и найшли три коноплянѣ зернятка.

Наш воробчик каже:

„То мои зернятка! Я найшов!“

А чужій собѣ:

„Нѣ то мои, то мои!“

И почали сважатися а дале битися, аж онѣ пѣря з них летить. Билися, билися, поки не потомилися.

Сѣли один проти другого, надулися и сидять. Вже и забыли, за что билися. Нараз приганули собѣ:

„А деж наши зернятка?“

Глядають, уже их нема. А по дворѣ ходить квочка з малими курятами, квоче та промовляє:

„Дурнѣ билися, а розумнѣ поживилися.“

Лебедь, щука и рак.

Лебедь плавав по водѣ по-пѣд берегом и зогнувш шию, дивився у воду. Плыла коло него щука, а увидѣвши его, зазвѣдала:

„Скажи, будь ласка, де ты бываеш, коли рѣчка замерзае.

„А на что тобѣ знати?

„Та я хотѣла бы на зиму куды-небудь утечи, бо пѣд ледом без свѣжого воздуха прийдеся менѣ загинути“.

„Я на зиму лечу у теплыи край и там живу до весны“.

„Возьми и мене з собою“ — сказала щука.

„А чому-ж нѣ. Для мене все одно. Хочеш, так пѣйдеме разом, буде нам веселѣйше.

Почув ихню розмову рак и каже:

„Возмѣть и мене“.

Як хочеш — то збирайся з нами. Разом буде веселѣйше. Дочекаеме осени, я вам тогды скажу, куды летѣти.

Минуло лѣто, настала осѣнь, лебедь каже: Ну, братики, пора летѣти у вирій *). Лагодьтеся на завтра. Послѣ обѣда рушимо в дорогу.

Щука сказала то ракови. Рак подумав и каже:

„А якже мы, сестро, будем на сухопутю жити без ѣды. Возьмѣм з собою на дорогу ѣдѣня, абы нам стало до самого мѣсця“.

*) вирій — теплый край.

„А в щож мы заберем?“ — зазвѣдала щука. Та возьмем возок, наберем на него харчѣв, запряжемся и поѣдеме. Попросиме и лебеда до товариства, — он нам поможе. Поѣдеме в трьох.

* * *

Рак и щука добыли воза, насукали з травы посторонок и ждали лебеда. Ня другій день прилетѣв лебѣдь и каже:

„Ну, вы тут готовѣ? — бо я вже лечу!“

Готовѣ, готовѣ, тѣлько ты будь ласкавий, поможи нам вѣз везти. Пожди, мы всѣ трое запряжемся и поѣдеме з Богом“.

„Добре, давайте менѣ посторонок“.

Лебѣдь взяв посторонок у дзюб. Рак взяв другій у клешнѣ, а щука за третій вчепилася зубами.



Потягнули — не мож.
 Що за бѣда? Що туй робити?
 А и не велика отся штука; —
 Так лебѣдь рвется пѣдлетѣти,
 Рак опирається и иде назад, а шука тягне у воду.

* *

Кто винен з них, кто нѣ — судити не нам,
 Та тѣльки-ж вѣз и доси там.



(Народня кавка).

У одного чоловѣка був старый кѣт, котрый вже не здужав и мышей ловити. От господарь вивѣз его в лѣс, покинув его а сам поѣхав.

Приходить до кота лисичка и звѣдуе его:

„Что ты такое?“

А ѣн каже: „Я пан Коцькій.“

Тогды лисичка одповѣла:

„Будеме жити разом в одной хижцѣ“.

Кѣтъ згодився. Веде его лисичка до своеѣ хижѣ. Привела та так вже ему догоджає: зловить де курочку, то сама не ѣсть, а ему принесе.

Раз побачив зайчик лисичку тай каже до неѣ:

„Лисичко-сестричко, прийду я до тебе в гостѣ“.

А она ему каже:

„Есть у мене теперъ пан Коцькій, то ѡн тебе розорве“.

Заяць розказав про пана Коцького вовкови, медведеви и дикому кабанови. Они зѣйшлися разом и стали думати, якѣ то побачити пана Коцького. На кѣнци кажуть:

„А зготуйме обѣд!“

Стали обдумовати, кому по что ити.

Вовк каже:

„А я пѣйду по мясо, абы поливка была лѣпша“.

А дикий кабан каже:

„А я пѣйду по крумплѣ.“

А заяць собѣ:

„А я капуста принесу“.

„А я меду на закуску“ — додав медвѣдь.

Поприносили всего, почали варити обѣд. Як зварили, сталися радити, кто мае ити кликати на обѣд пана Коцького.

Медвѣдь каже:

„Я не пѣдѣжу, як треба буде утѣкати“.

„А я також не повернуся добре, як бѣда“ — сказав кабан.

„А я старый и уже трохи не довиджую“ — мовить вовк. Осталось лиш зайцеви ити кликати пана Коцького.

Прибѣг заяць до лисиччиноѣ норы. Выбѣгає лисичка, дивиться, стоить зайчик на двох лапках коло хижѣ тай звѣдує его:

„А чого ты прийшов?“

Заяць одповѣв:

„Просив вовк, медвѣдь, дикий кабан и я прошу, щобы ты прийшла из своим паном Коцьким до нас на обѣд“.

А лисичка ему одповѣла:

„Я прииду з ним, але вы поховайтесь, бо он вас розорве“.

Зайчик прибѣгає до них и хвалиться:

„Ховайтесь, бо казала лисичка, что як он прииде, то подушить вас“.

Они почали ховатися. Медвѣдь лѣзе на дерево, вовк сѣдає за корчем, кабан рыєся у торѣшне листья, а зайчик лѣзе в корч.

Аж ту веде лисичка свого пана Коцького. Приводить до стола. Побачив он, что на столѣ богато мяса тай каже:

„Ма-в!... ма-в!... мав!“


А тѣ думаютъ:

От якій ненажера. Ще ему мало! Он ещє нас поѣсть!“

„Вылѣз пан Коцький на стол та почав ѣсти, аж за ухами лящитъ. Як наѣвся, простягся на столѣ.“

Кабан лежав близько стола в листю. Якось укусив его комарь у хвѣст. Кабан рушив хвостом, а кѣт думав, что то мыш, скочив из стола и вхопив кабанѣв хвѣст пазурами.

Як схопиться кабан — як стане утѣкати! Пан Коцький злякався кабана, скочив на дерево, де сидѣв медвѣдь. А медвѣдь, як побачив, что кѣт лѣз до него, почав выше лѣзти по деревѣ аж долѣз до тонкоѣ голузи. Та



не вдержала его голузь. Зломила ся а медвѣдь гуп на землю и упав на вовка. Як схоплять ся всѣ, як почнуть утѣкати! А заяць и собѣ за ними — забѣг не знати куда.

Потѣм посходили ся и кажуть:

„От якій малый, а трохи нас усѣх не поѣв!“

(STÁTNÍ TISKÁRNA V UŽHORODĚ 1923—1425.)